

欽定剿平三省邪匪方略

欽定剿平三省邪匪方略正編卷一百三

已未年

五月二十八日

乙酉

勒保奏言查額勒登保自抵

通江崖山壩之後本擬先剿洪口之賊因王登

廷一聞官兵將至復由絲羅壩折竄太平額

勒登保探得張子聰在竹峪關與前剿冉文德

未淨餘逆冉添元並綽號掃地王一股合夥屯

踞竹峪關西面包臺山勢頗猖獗額勒登保於

四月二十八日督兵趕至竹峪關拏獲哨探賊
匪十餘人訊悉該匪等恃險屯紮人數較衆額
勒登保於初二日卽率領阿哈保格布舍楊通
春各帶馬步官兵由溝底山邊分路進發當將
溝口賊卡兩座攻克斃賊三十餘人生擒吳子
來等十二名匪衆亂放鎗石悉力抗拒相持三
時之久因山勢遶陡難以仰攻徐徐捲撤旋在

後山驪道於初四日五更發兵攀援競進搶上
山梁殺賊百餘名餘匪潰奔杜家坪額勒登保
卽於次日率兵由青岡坪涼垭子等處分投追
截直至鐵坪地方沿途斃賊二百三四十名生
擒陳自清等五十三名賊匪旋卽翻山遁去初
六日派兵搜捕又殲獲三十餘名額勒登保恐
其折竄陝境卽帶兵由老官山兜截初九日午

後賊匪正翻菜子寺山梁適我兵趕到立斃騎
馬賊人數名步賊五十餘名生擒十六名旋卽
折竄黑池梁該處路徑險仄匪衆跌斃人馬甚
多我兵由小驪壩繞截初十日趕上賊尾又斃
賊六七十人幸不致闌入陝境賊匪大夥已向
甯江境內竄逃而打散之賊或數十匪或數百
人俱在各處肆竄

臣

一面知會額勒登保派兵

肅清後路一面飛飭前派通巴查賑之知州劉
清督同知縣徐廷鈺趕此賊勢渙散設法招撫
即可散其黨與於剿捕更爲有益至德楞泰

路自太平由官渡溪裏糧前進截賊竄陝之路
詎徐添德龔建等祇在老山林內避兵而行輾
轉奔逃欲思疲我兵力旬日來我兵逐日探追
未得遇賊接仗德楞泰至老鴉口地方探得龍

紹周唐大信等尙在界嶺屯聚相距較近卽於
初五日由倉坪口馳抵界嶺賊已聞風竄出陝
境斬獲落後賊匪二十餘人搜出難民四十五
名口訊知該匪等由安康之滄水河向麻柳壩
竄去德楞泰卽帶兵追躡初六日抵滄水河忽
探報又有一股賊匪千餘人由平利之白土
關竄來現紮泥坪在我兵之後德楞泰恐腹背

受敵卽在滄水河紮營連夜派兵分爲三路先
剿泥坪之賊初七日巳刻至花石埡正遇賊匪
蜂擁上山我兵遂剿數十人將匪衆壓下溝底
立形慌亂四散奔逃官兵乘勢抄殺斃賊三百
餘名生擒賊目伍世明賊匪李應龍等三百八
十一名口訊據伍世明供係王光祖之徒與張
添倫夥內分出賊目宋大志共領戰手一千餘

人在竹谿平利境內被兵勇截回欲竄太平今
遇官兵被擒宋大志不知下落德楞泰正在督
兵搜捕又據探有賊匪潛來窺伺滄水河營盤
鎗礮聲緊卽帶兵回營策應賊匪一見官兵旋
卽退遁因天晚不及窮追擒獲賊匪甚彼良訊
係龍紹周一股在麻柳壩探知官兵已赴泥坪
是以派人前來劫營德楞泰現赴麻柳壩進剿

臣查德楞泰一路兵勇共有一萬二千餘名較各路爲最重勁旅亦多前因各股賊匪均在老山林內被其牽掣未得痛加剿戮今追剿龍紹周赴陝而徐添德龔建等均在川境未便專剿龍紹周而置徐添德等股於不顧且宋大志等剿散餘匪現又逃竄入川已札囑德楞泰酌留兵勇六千餘名剿辦龍紹周夥匪務須迅速殲

除並卽分兵一半派賽沖阿李紹祖等各帶馬
步隊分剿川境之賊庶不致顧彼失此其包正
洪等賊匪連日經朱射斗於大竹之涼風埡接
仗斃賊三百餘名生擒周念富等十八名又於
隣水之栢林壩斃賊一百餘名生擒冷祥等十
五名勢漸窮蹙現竄江北長壽之兩岔河上已
飛飭該鎮奮力殲除不可因連次得有勝仗予

賊以暇至卜三聘一股尚在雲陽大寧之老山林內屯踞近據大寧縣鍾蓮稟報又有平利竄來張添倫報內之賊已入縣境臣已飛飭七十

五督率鎮將分股堵剿勿任賊匪東竄楚疆又

王登廷一股頃據探報復由太平折竄竹峪關

在額勒登保之後臣恐被其牽綴且額勒登保

一路兵力尙單臣將雲貴補額官兵及臣營兵

內湊撥四千餘名派令副將稽大榮叅將張良
槐等先後帶往相機截擊以資策應其張映祥
一股竄近畧陽臣察探賊勢非竄寧羗卽奔川
境昨奉

諭旨恐其闌入川西川南飭令恒瑞趕緊截剿查川
南相距尙遠惟龍安爲川西門戶與階文相接
早經臣添派員弁帶領兵勇設卡嚴防該處有

白水江之隔前此屢有賊匪窺伺俱被兵勇擊退現又嚴飭沿江各州縣實力防堵並知會恒瑞設法截擊免致蔓延其張漢潮一股折竄五郎明亮跟蹤追剿現蒙

皇上特放慶成爲成都將軍飭臣撥兵管帶查慶成

打仗素稱勇往若在明亮一路幫同剿賊自能

得力臣已飛咨恒瑞等將富成隊內前撥明亮

一路之兵三千名卽交慶成管領足資協剿又
張添倫高均德兩股經倭什布策勵將士痛剿
截回現有竄入大寧者有仍在平利遊奕者

臣

已嚴飭王文雄柯藩慶溥等均須實力堵剿倘
能與德楞泰會同夾擊先完一二股自不難以
次蕩平至此各路打仗惟德楞泰一路陣亡
千總虎正江其餘弁兵間有傷亡容俟查明分

別咨部

勒保又奏言查德楞泰一路官兵先經英善等具奏據糧員稟報每月需銀九萬兩嗣據德楞泰自行查奏每月需用鹽糧夫騾各價五萬四千五百餘兩其中鄉勇雇價及糧員隨帶之夫騾等項均未列入旋經部議祇准銷官兵鹽菜銀一萬三千九百餘兩此外與例不符之夫騾

等項一併著落德楞泰名下賠補其勢本屬難行臣查此次教匪滋事之始各路官兵在陝楚

時應付夫騾各項本未照例辦理大屬浮多迨

入川以後帶兵各員因應付在前不肯稍減宜

綿亦卽因循支給嗣臣與福寧先後到川已將

浮費全數刪除其與例不符而勢所必需各款

議定章程會奏乃經和琳等逐條議駁其中有

萬難遵辦之處昨又詳細臚陳已茲

睿鑒以現在所定章程而論均係實用較之從前大
爲節省斷難再減德楞泰一路自應照此核算
庶足以折服其心查德楞泰自去年五月間帶
兵入川本有滿漢屯土官兵九千零三十五員
名九月以來除寄留各處傷病兵丁外實有存
營兵七千餘名官弁六百餘員迨至本年正月

與會合之後又陸續添撥兵勇共行一萬二

千餘員各核計每月官兵鄉勇照現定章程分

例需銀將及六萬兩而隨營糧員所需馱運軍

火礮位糧餉之夫騾等項尙不在內德楞泰自

去年五月杪入川截至本年四月底止前後在

達州保寧兩局共領過餉銀五十三萬五千兩

通盤牽算有缺無贏且糧員經手支放皆有兵

勇數目可稽非德楞泰所能捏款浮冒一俟
前奏章程奉部覆准即可通行遵照所有前此
浮用各款再當逐一查明於濫支濫應各員名
下分別追賠以歸核實再各州縣起運米石如
果有心玩悞以致短缺兵糧自當據實嚴叅重
治其罪惟因官兵追剿賊匪愈進愈遠夫驟負
重過行不能兼程前進並有後路或被賊阻之

時又須繞道運送未得一時解到者其實並無
朦朧遲延解送不力情事總之統領各員中惟
額勒登保能知大體或遇糧餉實有人力不能
運到之時偶致缺乏卽自行設法通融籌辦從
不以此藉口其餘皆不問輓運之難易惟知糧
餉必須充裕稍有短缺遂嘖有煩言甚至打仗
不能得手卽歸咎於辦理糧餉之員此等積習

明亮德楞泰均所不免德楞泰之與福寧彼此
齟齬皆由於此而福寧籌辦軍需失之過刻又
恐各領隊諸臣退有後言遂爾形之奏牘欲爲
預佔地步卽如前奏德楞泰一路正二兩月撥
過銀二十萬兩原屬含糊其詞迨奉

諭旨飭查不得不將截長補短之處據實具奏又致

自相矛盾殊非核實辦公之道

臣蒙

聖慈畀以經畧重任如將領任意濫支或糧餉辦理不善自當據實核叅斷不敢意涉偏私亦不肯心存瞻顧祇期和衷籌畫無悞師行庶幾及早蒞功上紓

宸厪奏入

上命軍機大臣傳諭勒保曰勒保奏賊匪分竄情形計有七股此內張子聰一股與冉添元等合夥在

包臺山屯踞額勒登保由後山躡道攀援競進賊
匪奔潰官兵又由老官山等處兜截逼向南江不
致闌入陝境實屬奮勉可嘉惟德楞泰所追龍紹
周等一股總未得與賊接仗雖在泥坪地方將另
股之賊剿退又令龍紹周逸入陝境德楞泰並未
截住所辦何事德楞泰統領兵勇一萬二千餘名
較之他路兵力尤爲壯盛且多吉林黑龍江勁旅

乃伊自分路剿賊以來總未撲滅一股賊匪擒獲
一名首逆以如此重兵專剿龍紹周敗逃餘匪置
徐添德龔建於不顧復任聽龍紹周由川入陝來
往自如是其不能認真出力玩愒稽延又爲富成
之續矣勒保摺內微露不滿德楞泰之意並未據
實奏叅伊係經畧大臣統攝各路軍律不可不嚴
既有過失卽應嚴劾何必隱躍其詞耶著勒保秉

公查明如德楞泰實有貽誤怠玩之處卽行嚴叅
革拏治罪俾各路帶兵大員咸知儆懼毋得稍事
姑容至德楞泰現帶官兵內勒保撥出六千名交
賽冲阿李紹祖分剿徐添德龔建一股賊匪其餘
兵丁如德楞泰果應叅革卽可令阿哈保楊遇春
管帶專剿龍紹周或察看此二人不能帶領多兵
現在額勒登保一路兵力畧單或將此項兵丁酌

量分撥額勒登保軍營以資得力總在勒保相度
辦理迅速具奏又包正洪一股竄至長壽係朱射
斗剿辦卜三聘一股尙在雲陽大寧一帶屯聚係
七十五剿辦著勒保飭知該鎮等嚴密防堵毋任
東竄楚疆爲要其張添倫高均德兩股業經楚省
截回仍在平利邊境遊奕卽著照勒保所奏令王
文雄柯藩慶溥等實力剿辦現在賊匪所至之地

皆有專辦之人倘何股賊匪竄出卽惟何路帶兵
大員是問凜之慎之至白水江一路爲川西門戶
恐賊匪由階文南竄業經降旨令勒保派員帶兵
前赴該處防堵今勒保尙未接奉此旨已籌慮及
此添派員弁帶領兵勇設卡巡防與朕旨不謀而
合具見留心可嘉務當飭令該員弁嚴密防範勿
令賊匪窺伺所有打仗陣亡之千總虎正江著咨

部議卹又據奏查明德楞泰一路支用餉項一節
據稱前經和珅等逐條議駁其中有萬難遵辦之
處其意以例外支應各欸若部中概予准行則德
楞泰領過餉銀通盤核算便無浮冒殊不知從前
和珅意爲准駁不合例之事此時悉改歸舊制若
果據例議駁卽今之部臣亦不能違例准行也前
摺已交部核議俟議定分別准駁再交勒保按照

條欸另行查辦至所稱帶兵各員中惟額勒登保
偶遇糧餉缺乏卽通融籌辦從不以此藉口其餘
遂嘖有煩言實爲公論額勒登保自帶兵以來身
先士卒屢獲兇渠惟知以軍務爲重而於糧餉偶
缺之時卽自行設法辦理如此方爲能識大體忠
盡之臣深堪嘉獎各路帶兵之員打仗不能得手
往往歸咎糧餉不繼嘖有煩言者能不聞而生愧

耶

同日倭什布奏言查張添倫高均德馬得貴等
股賊匪前由陝省平利先後竄擾竹谿邊界經
兵勇分投剿退後該匪仍在平利境內屯聚滋
擾臣督飭沿途各卡隘嚴密防堵該匪不敢再
窺楚境折向川省大寧屬之東谿河太平屬之
兩扇門等處距楚省邊界約有二三百里不等

臣

思賊蹤漸遠邇此寧謐無事之時正可將防

邊事宜次第整飭布置計現在竹谿境內西南

北三面邊界飭令總兵路超吉率同叅將海麟

遊擊揆明等帶領官兵三千七百名鄉勇二千

四百名分段設卡竹山縣南北兩路與川陝毗

連隘口亦多飭令守備張懷毓千總黃富國等

帶領官兵七百名鄉勇一千六百名分段設卡

房縣則西南邊界與川省大寧相連飭令副將
樊雄楚叅將蔣觀濤等帶領官兵七百名鄉勇
一千八百名分段設卡江北鄖縣鄖西與陝省
交界之處南臨漢江尙屬有險可憑西北一帶
徑路紛歧飭令叅將朱廷荃道員恒慶等帶領
官兵一千六百名鄉勇一千三百餘名分段設
卡似此周防分佈可期聲勢聯絡不致顧此遺彼

倘遇緊急有須調撥接堵之處更當隨時斟酌
辦理此外臣自帶兵一千三百名實力巡邏以
備策應所有現在籌佈邊備謹繪圖貼說恭呈

御覽再臣

接准勒保來咨索倫吉林官兵隨征日久

馬匹多有疲乏囑於楚省各營存馬內挑撥三

四百匹解川以資剿賊臣

隨會同撫臣高杞於

標下及各營屬存營馬匹內挑撥驍壯馬四百

匹選派妥幹備弁迅速解赴勒保軍營驗收並
嚴飭押解員弁沿途小心喂養一面仍飭各標
營俱照數買補足額以資操防

倭什布又奏言前因安撫難民解散賊黨一事
奉到

諭旨周詳訓示臣到楚後遵卽刊刻謄黃於川陝交

界處所通行張貼簡明告示嚴諭邊卡

兵勇遇有被裹散出難民不許擅自殺害伏查
連年教匪滋事到處焚掠良民被其裹脅者或
恐既入賊夥投出不得生全或因產業蕩然歸
來絕無生計不得已從賊奔走以延殘喘其情
實堪矜憫今蒙

皇上剴切宣諭不惟不加罪譴且令妥爲安撫若輩
以鋒鏑餘生咸登衽席自必輸誠恐後翕然來

歸惟是教匪起於襄陽此時川陝各股賊匪中
多有籍隸楚省之人聞風投回者人數必多不
特居之食之務使無一夫失所而推誠撫字之
中尤須寓默化防閑之術均不可不預爲籌計
臣月餘以來查照勒保所奏章程與高杞再四
講求詳加體察其從前賊擾各屬被難軍民業

蒙

恩加賑卹給予房屋修費次第復業各安耕作至於
被裹難民除其中有緝獻賊首悔罪立功之人
另行奏請

加恩外其由川陝兩省來歸者現在咨明勒保及陝
省督撫卽由該省詢明姓名及籍貫分起給以
路票遞送回楚再由楚省沿邊各州縣換給路
票轉送回籍所過地方遵照章程無論男婦計

其程途每名每站日給口糧米五合盤費銀三分到籍之後擇其家尙有親屬者卽令認領回家否則本有田有屋及有執業確憑者卽照數給還毋庸另予賑卹修費其或雖有田畝被裹後久已荒蕪房屋又爲灰燼者乍歸無所依恃或酌借籽種或照川省之例每戶給以搭蓋草棚之資五錢尙本籍並無田產亦無親屬而年

力尙屬精壯者遊蕩無業恐易滋事則不必定
送原籍或察附近地方有應行興修堤城各工
撥令工作以工代賑或分撥沿途糧運文報各
站充當站夫如實在老幼殘廢及無歸婦女力
不能傭作者令該地方官斟酌情形或歸入養
濟院收養或於孤貧項下量給口食至若臨敵
解散率衆投誠者尤須細心審察別其誠僞坦

懷慰諭以安其身心隔別居處以散其羣類然
後派委妥員先就左近地方分投安插查明原
籍有執業確據及老幼無依者照例資送回籍
其年力精壯無業可復之人如一縣不過數人
送交原籍地方官權宜分別安頓如一縣多至
數十人十餘人卽分撥各工所站所毋使聚集
一處統俟軍務全行告竣再照災賑之例酌量

核辦如此分別安插再令各地方官隨時不動
聲色留心稽察毋許滋生事端亦毋許在籍鄉
民妄生攻訐似於化莠安良均有裨益日前張
添倫等股賊匪竄近竹谿其被裹之人疊次被
官兵剿散擒獲及自行投出者二百五十八名
臣卽如此辦理內有川陝兩省民人一百一十
八名已令隨營糧員及地方官訊明籍貫予以

口糧盤費填給路票一面令地方官知照前途
州縣一體咨送回籍一面由臣咨明勒保及陝
省督撫飭屬收卹至於遞送難民應給銀米雖
已核有定數第州縣賢愚不一倘不實心經理
甚或浮濫開銷均未可定現在飭令沿邊各州
縣嗣後由川陝遞送回楚者該州縣換給路票
之後將所執前途路票收齊彙繳藩司俟該難

民送到原籍後復令原籍州縣將邊界州縣換給之票亦繳藩司核對沿途所給銀米卽令按日按站於路票上註明則回籍之民不致中途流落而姓名戶口確有可稽州縣亦無從濫冒其有自行投回無前途路票可據者則令隨時報明查核臣與撫臣復選派廉明之員不時分投查察如有辦理不能妥協者一經查出卽據

實嚴叅以期帑不虛糜民沾實惠均奏入

上命軍機大臣傳諭倭什布曰倭什布奏安設楚省
各邊界卡座操練兵勇所辦俱好足見留心籌畫
布置得宜現在竹谿竹山及房縣鄖西各處皆有
文武員弁率領兵勇於要緊隘口分路周防使川
陝兩省竄匪聞知楚境守禦嚴密官兵聲勢聯絡
自不敢前來窺伺此實先事預籌之良策倭什布

務當悉如所奏情形盡心妥辦不可徒託空言至
安撫難民各事宜辦理亦尙妥協惟所稱由川陝
兩省受撫來歸年力精壯者撥令工作或分撥各
站充當站夫雖爲分散難民起見但令在工所力
役則可而置之各站則不可此等從賊營投出之
人終不可信倘故智復萌與賊黨暗相勾結或將
糧運文報阻滯稍有不虞所關非細此事斷不可

行其有業經辦理者著倭什布卽行更換另籌安
插又昨吳熊光奏張漢潮一股賊匪由商雜竄入
豫境經官兵截回後復自陝境之富水關一帶竄
入盧氏據拏獲賊匪供稱張漢潮蓄意竄回襄陽
本籍今又據鞫保奏張添倫高均德兩股賊匪現
有竄入大寧者有仍在平利遊奕者是張漢潮旣
欲假途回楚而張添倫等尙逼近鄖陽均不可不

實力防堵現在明亮已至廬氏邊界與吳熊光等

專剿張漢卿一股不能兼顧西南一帶勒保已飭

令王文雄柯藩慶浦前赴平利著倭什布察看情

形如張添倫等一股緊要卽在鄖陽本境以堵爲

剿與王文雄等爲兩面夾擊之計其襄陽一帶著

派安幹鎮將實力防禦務使兩路竄匪不能闖入

楚境卽屬倭什布之功不可不倍加奮勉也再前

此陣亡衆將董寧川有無子嗣曾降旨令胡季堂
查奏茲據奏稱董寧川有子官保現年十四歲尙
在湖北任所著倭什布卽將董寧川之子及家屬
妥爲送歸直隸原籍俟及歲後送部引見以示嘉
勵忠藎之意

同日廣厚奏言

臣

接據探報藍號賊匪由隆林

橋南竄階州之草川鋪富成由雷家壩逆追

臣

因與吉蘭泰商酌若與富成一路追剿紆遠而
不得力揣度該匪必由佛入崖奔赴陽平關遂
卽督兵自大川壩進發以期迎頭攔截與富成
兩面夾攻嗣行抵大川壩忽報白號賊匪在郭
家壩被恒瑞剿敗已連夜折竄至太石山距大
川壩僅一犀牛江之隔臣思無論何號賊匪遇
見便應剿殺隨即催兵截擊詎江水漲發湍流

迅疾不能洶渡旋有騎馬賊數十人在對岸窺探瞥見我兵卽折回奔跑兵丁馬伏才等見水而過奮勇趕殺該匪等棄馬上山被我兵戳死七人該匪遂率其醜類沿西北江岸向秦家河奔逃適督臣松筠前赴富成軍營由臣營經過稟明往剿此股賊匪當卽帶兵沿江東岸逼追行至雙廟子地方探聞賊匪已由鐵鎖橋偷渡

犀牛江現在西和之徐家壩楊家嘴一帶屯聚

臣查白號賊匪人數雖衆經恒瑞與臣等先後

在社棠鎮郭家壩等處痛殲折損較多不敢復

與官兵接仗惟狡猾異常日在深山密林之中

往來繞避冀延殘喘且賊匪騎馬我兵步行迎

擊則旁竄追殺則窮奔是以圍捕頗覺費手茲

官兵驟至雙廟子賊匪尙未偵知臣等因于四

更時出其不意冒雨進兵山陡路滑都司陳五
輯署同知縱司燭不辭泥濘領兵先行各將士
相率繼進黎明至徐家壩山梁陳五輯縱司燭
率兵一擁而下直撲村內該匪驚駭喊叫爬山
四散竄匿深林我兵分投掩殺斃賊六百餘人
殺死賊目僞總管劉開允一名生擒楊生才等
七十二名其本地被裹之人乘機逃散者甚多

我兵雖間有受傷並無陣亡訊據賊供該匪等
來到甘肅屢被剿殺實在情急欲逃回四川奈
官兵四面圍截不得過去當將楊生才等五十
六名卽行正法其餘趙之剛等十六人內有面
刺白蓮教三字者詢爲賊匪所刺實係被裹本
地良民酌給盤費概行釋放並飛飭附近州縣
有似此逃散刺字者務須查明遣回勿令守卡

兵勇戕害

臣

等俟雨勢稍止卽督兵星馳趕剿

務期全數殲除再

臣

前據循化同知成順稟稱

撒拉爾回民總約韓四個等呈告前赴軍營協

剿賊匪

臣

以該回民係化外邊氓非入伍兵丁

可比約束較難是以上年調赴四川旋即退回

且查隨征官兵足敷剿捕批令將該回民今爲

撫慰酌加獎賞去後旋據成順覆稟該回民韓

四個等以前此調赴四川因水土不服未俟軍務告蒞卽行回巢實在辜負

天恩今賊匪現在本省滋擾必欲前赴軍營報交將功補過定於四月二十八日起程並經韓四個與其子韓三個捐備資斧給與衆人前赴軍營

臣以該回民旣係止於真誠自應允其所請但

素無紀律恐其沿途滋事當派熟習回情之把

總馬壯等迎赴前途彈壓松筠接據稟報亦派
委都司馬良棟署成縣知縣李世華馳往照料
並賞給銀兩獎勵茲該總約韓四個率領撒拉
兩回民等四百九十八名於本月十六日到營
詢悉該回民一路行走甚屬安靜此次跟隨在
徐家壩楊家嘴打仗殺賊亦極出力臣現已將
韓四個父子捐備資斧宜請給還以示體卹奏

大

上命軍機大臣傳諭廣厚曰富成在雷家壩追躡藍
號賊匪畏葸無能全不足恃廣厚能揣度賊蹤卽
督兵迎頭攔截兩面夾攻所見甚是及探知白號
賊匪由鐵鎖橋偷渡犀牛江該司並不拘泥卽連
夜趕往冒雨進攻殲擒賊匪多名實爲出力可嘉
至撒拉爾回民捐備資斧呈請來營不但行走安

靜打仗亦甚出力實爲踴躍急公所有伊等捐資
自當如數給還如果始終奮勇尤當厚加賞賜並
據實保奏候朕加恩賞給翎頂以示獎勵

三十日丁亥富成奏言臣於十三日探得賊匪經

我兵連次剿殺之後日夜散竄沿途多有逃亡
因卽兼程馳追十六日晚起抵齊家梁知賊匪
竄至黨家坪將近湯平關冀圖過河遠竄因河

水盛漲並無船隻未能偷渡復折回至楊家壩
一帶距臣所紮之齊家梁約五十餘里當將我
兵分爲兩路令副將海常叅將傅雲等帶兵一
千五百名由左手山溝而進臣帶領遊擊楊國
林守備楊正明等帶兵一千五百名從右手山
梁而進均於四鼓起行黎明行近該處遙見騎
馬賊匪約有六七百人步賊二千餘人一見我

兵卽齊上對面山梁臣督兵馳下施放鎗礮仰

攻賊匪亦放鎗抗拒擲石如雨我兵不避鎗石
奮力急攻適海常一路官兵趕到賊匪卽時敗
竄我兵隨攻上山梁賊匪大半棄馬翻山狂竄
我兵追殺十餘里連斃騎馬賊匪四名賊匪皆
過河遠竄時雨勢轉大卽在該處暫紮是晚探
得賊匪仍由蔣家山陽平關一路奔逃恐該匪

等復思過河遠竄

臣

當卽挑派奮勇兵二千名

帶同遊擊王應鳳巴圖魯守備馬昌傑等兼程

前進並派海常楊國林等帶兵一千五百名在

後策應卽於十八日冒雨前進十九日探得賊

匪在蔣家山一帶相距不遠

臣

卽一面催調後

隊一面將

臣

所帶官兵分爲三路出其不意一

齊並進時賊匪男婦大小正在該處暫息不意

我兵猝至立時慌亂一齊竄逃我兵鎗箭並發
斃賊十餘名隨即緊追二十餘里至毛堽山該
處道路狹窄泥濘甚大賊衆行走擁擠被我兵
殲斃二百餘名該匪逃避不及皆攀援樹枝爬
上懸崖捨命亂竄滾崖跌斃男婦大小復有二
百餘人餘皆四散狂奔臣卽乘勢窮追五十餘
里又斃賊八九十名時已昏暮因令各兵暫息

一面趕辦乾糧散給各兵裹帶卽於二十日督
兵連夜進追二十一日馳抵濟道溝遙見右手
山梁有賊匪百餘人當卽督兵進攻該匪等始
猶擲石抗拒經我兵四面搶上殲斃數十名生
擒熊興漢等十五名訊供逆首張世龍張世虎
等原說要上陽平關由彼逃往四川因河水甚
大聽得陽平關有兵防堵不敢過去要折竄畧

陽不想被官兵打散又要上階州逃避隨連夜
過燕子河因聞知官兵又來一時慌亂正值河
水大漲淹死三四百人餘無要供查此內張現
堂等十二名甫經被裹卽行釋放其熊興漢楊
昌明黃定周等三人訊係從賊日久卽行正法
我兵連日打仗亦間有傷亡者容俟查明造冊
咨部現在趕搭浮橋兼程馳追臣惟有乘其窮

蹙之際趕緊剿辦務期迅速掃除奏入

上命軍機大臣傳諭松筠曰富成奏在蔣家山等處
追賊殲斃二百八九十名又在燕子河淹斃三四
百人富成現在兼程追往趕緊剿辦所奏情形似
有悔懼之意前因富成自正月以來怠玩避賊一
切軍情並不隨時具奏已令松筠將富成革職拏
問計此時松筠已前抵富成軍營自能力加振作

迅奏捷音至富成因循貽悞之罪原不可追松筠
自當遵照節次諭旨嚴行定擬但思富成前此恇
怯退避或係漸染軍營惡習今見朕申明軍紀信
賞必罰心存畏懼勉思自贖豈有不予以改悔自
新之路且伊久在行間帶兵究係熟手尙可留營
効力著松筠查明此次富成所奏剿賊情形是否
屬實若果悔過出力卽於具奏時另摺聲明候朕

酌量加恩

欽定剿平三省邪匪方略正編卷一百四

巳未年

六月初二日

巳丑

恒瑞奏言白號賊匪自前次痛

剿後復由茨溝平洛一帶向北狂奔

臣

連日趕

緊追殺衝散餘匪有在沿途老林深溝潛匿者

或數十人及百餘人不等

臣

一面帶兵躡追一

面分派將弁搜捕其計殲獲賊匪孫有信等二

百七十餘名又因天雨路滑滾崖跌斃人馬不

計其數其被裹難民趁勢逃散者亦多訊據獲賊供稱因甘省難以掠食衆人本想要往川西龍安不意連日官兵追趕緊急傷斃多人沿途不敢停留焚掠已經兩日絕糧等語是該匪實已窮蹙查廣厚古蘭泰索費英阿等官兵並撒拉爾回兵均在北面西和一帶正可兩面夾擊殲滅此股忽據探報藍號賊匪又從米倉山南

竄^臣恐其復向川西龍安等處奔逃雖有富成

帶兵追剿現在松筠遵

旨將富成拏問並在經畧勒保來咨令將富成所帶

鄉勇均行裁撤其原領雲貴四川官兵卽撥赴

陝省交慶成管帶會同明亮永保剿辦張漢潮

一股是富成一路兵勇已無可恃萬一此股賊

匪闌入川西必致完善之區又遭蹂躪^臣不敢

拘泥剿辦白號賊匪已札知廣厚吉蘭泰等由
北面截擊白號臣卽兼程由賈家店黑馬關一
帶趕緊抄截藍號不使竄向川西致煩

聖厪

同日廣厚奏言白號賊匪經臣等帶領官兵在

徐家壩楊家嘴等處擊敗後卽連夜奔赴成縣
之勾旗寨一帶蟻聚查勾旗寨僻處深山路徑

叢雜若該匪被剿情急或又北竄秦州西竄禮
縣前面無兵攔截轉屬非計當與吉蘭泰酌商
吉蘭泰帶兵一千九百名赴各該處適中之地
扼要堵截以遏賊匪折竄西北臣帶兵二千名
並撒拉爾回兵卽日冒雨向勾旗寨進發賊匪
望見我兵卽搶佔山梁負隅抗拒臣督率將弁
悉力仰攻賊匪鎗石齊發不能前進都司陳五

輯奮勇當先攀巖上嶺殺賊一入奪獲偽帥旗
一桿各將備趁勢擁上詎賊匪捨命抵禦陳五
輯腿中矛傷兵丁亦間有傷亡時已將暮

臣目

擊焦灼見東北山溝有小路一條因派署同知
縱司燭帶兵二百名飛往攻撲將執旗賊目戳
死匪黨頓形慌亂紛紛翻越後山向徽縣之麻
陽河奔逃並擊保都司陳五輯等率兵分投

掩擊追殺二十里殲斃賊匪四百餘名生擒羅
國仁等男婦四十八人其本地被裹之人徑署
知縣李世華署縣丞席濂等四路招呼逃散者
約有八九百人惟值大雨如注兵丁衣履盡濕
暫令憩息俟雨勢稍止卽當督催趕剿並一面
知會吉蘭泰由北而南嚴爲堵截勿令乘間竄
入秦州兼可兩路夾攻所有傷亡兵丁查明咨

部辦理再查都司陳五輯屢次殺賊不避鋒鏑奮勇當先且能激勵兵丁令其出力又署寧夏府同知州同借補河州州判縱司燭前署河州狄道州均有循聲此次隨臣剿辦賊匪同將備一體帶兵打仗極爲出力每遇差探賊情查看進兵路逕亦俱勇往直前不避艱險洵屬分外出力可否量加鼓勵之處出自

皇上天恩均奏入

上命軍機大臣傳諭恒瑞廣厚曰白號賊匪節經恒瑞痛加剿殺向北狂奔勢已窮蹙因北面一帶已有廣厚吉蘭泰等帶兵截擊恒瑞卽由賈家店黑馬關一路抄截藍號賊匪杜其竄入川西之路並不因白號賊匪節經剿敗就易避難所見甚是藍號賊匪向南奔竄意圖擾入川境此現在最關緊

要之事恒瑞能見及此深堪嘉獎勉力爲之佇盼
捷音卽至至此大廣厚追剿白號賊匪冒雨進攻
不予以暇所辦甚好都司陳五輯因賊匪負隅抗
拒奮勇當先攀陟山嶺腿中矛傷後猶復鏖戰殺
賊署同知縱司燭奮力向前戳死執旗賊口均爲
出力可嘉朕披閱至此已於該都司州判姓名上
用硃筆圈出卽欲加恩及閱廣厚保奏請分別賞

翎甚爲公當陳五輯著賞戴花翎以遊擊陞用縱
司燭著賞戴藍翎遇有應陞缺出卽行奏補向來
軍營帶兵各員多有虛報功績濫行保奏者前經
節次降旨嚴飭是以帶兵各大臣不敢如從前之
濫行保奏但軍營賞罰嚴明其實在出力之員不
可不據實陳奏廣厚帶兵數月以來從無保奏乞
恩之事此次所保陳五輯縱司燭實係出力應保

之員是以特加恩獎嗣後軍營帶兵大員固不可
濫行保奏如果實有出力奮勉者亦不可屈抑必
當據實奏聞候朕酌量加恩

同日吳熊光奏言查張漢潮蓄意逃回襄陽本
籍因明亮等大兵追剿緊急其勢直向東趨

臣

先密飭署嵩縣守備司勇琦帶兵於伏牛山要
隘嚴防二十三口又派叅將蔡鼎帶兵抄赴東

面埋伏並飭東路各州縣集勇協堵鎮臣張文
奇田永稠由南北兩路趕緊截剿因層巒疊嶂
中賊匪易於乘隙逃遁並令都司蘇大雄帶兵
往來接應臣亦率領滿兵繼進該匪前自商南
雒南分股東竄經張文奇蔡鼎等分路擊退後
仍復合爲一股捨命狂奔直撲界嶺經守備楊
景芬率兵轟擊賊匪不擇路徑折由里漫坪牌

樓薄翻山偷越適蘇大雄聞信趕往截殺賊又
翻山由黃柏溝一帶奔竄該都司復抄至賊前
因見賊多兵寡勢難力敵該都司將所帶五百
名兵分爲兩隊藏入樹林窺賊頭隊方過出其
不意率兵衝出攔腰截殺賊匪措手不及自相
踐踏其時守備楊景芬亦已趕到官兵奮力攔
殺賊匪首尾不能相顧在後一股仍翻界嶺向

西溝遁逃其前一股向西北毛坪奔竄蘇大雄探知明亮大兵已自西追及又有張文奇在青油河一帶堵截後股賊匪自不能竄回因朱陽關爲賊匪東竄要路與楊景芬抄赴東面將頭股賊匪截回西北蘇大雄趕往北面兼顧盧氏縣城楊景芬留駐大河口遏賊東趨又經縣丞林嵐帶領兵勇由東北一路下壓賊匪偵知處

處有兵仍復折回向西山老黎溝一帶扒山竄
出豫境此時兩股賊匪俱折回雒南境內明亮
統領大兵分路追截

臣

諄囑兩鎮及各將備等

鼓勵弁兵於陝豫交界嚴密堵截預備夾擊並
將叅將蔡鼎調回仍駐西坪防守數日以來大
雨連綿山溪漲發幾於處處阻隔官兵奮勇抄
繞或裹糧浮水而渡或攀躋仄徑而趨甚至冒

雨露宿一遇賊匪均能踴躍爭先鎮臣張文奇
遊擊李正品均能奮勇都司蘇大雄尤爲出力
節次橫衝迎擊殲賊甚多生擒李應輝等五十
七名乘勢逃散者亦復不少臣留心安插以示
招徠各路打仗兵丁間有傷亡容俟查明咨部
惟是臣與明亮往返密商以張漢潮此次竄入
豫境正可趁此機會四面兜擒無如山徑紛歧

賊匪往來熟悉其股數又分合無常以致牽制官兵游魂漏網雖訊據獲賊供稱張漢潮衝撲界嶺與官兵接仗時已中鎗傷並頭目高玉春亦已受傷甚重然臣未能幫同明亮迅速擒渠實切愧憤惟有獎勸弁兵與鎮臣張文奇田禾桐督率鼓勵賊遠則分路嚴防賊近則合力夾剿務期速滅此賊仰慰

聖懷至此次賊匪沿山奔竄地方因官兵追緊不敢

停留被擾村莊無多臣現飭該地方官逐一詳

查妥爲撫卹再臣由東路迎截現亦趕抵朱陽

關前途復爲谿河阻隔正在拜摺間適據探差

問道回稟明亮追剿賊匪連日大獲勝仗由樂

莊一帶向西追殺又恐後路餘匪未淨已有鎮

將等在沿邊一帶足資搜捕刻下天氣開霽臣

卽覓路趕往督率辦理萬一賊又回竄立即迎頭截剿以期迅速肅事奏入

上命軍機大臣傳諭吳熊光曰張漢潮蓄意竄回襄陽本籍直向東趨經吳熊光派令鎮將分路截擊並帶兵親往策應賊匪不能深入豫境向西折竄
雒南張漢潮在界嶺地方身受鎗傷亦係豫省官兵之力吳熊光所辦甚好至明亮久無報至正深

盼望茲吳熊光奏稱明亮追剿賊匪連日大獲勝
仗由欒莊一帶向西追殺覽奏稍慰張漢潮本係
老病無能之賊今又中鎗傷諒此殺賊匪不日可
以撲滅矣其所稱覓路趕往一節似可不必此時
賊匪若在附近數十里山內藏匿吳熊光前往搜
捕能將首逆擒獲固屬甚善今賊匪離豫已遠有
明亮在彼截殺吳熊光祇須在本境防堵毋庸遠

越數百里幫同剿辦所有此次打仗出力之都司
蘇大雄尤爲奮勇必應獎賞該員前已賞戴花翎
并遊擊職銜著再加恩卽補遊擊實缺加叅將銜
並賞給庫齊忒巴圖魯各號守備楊景芬亦屬奮
勉遇有應陞之缺卽行陞用以示獎勵

初三日

庚寅

上命軍機大臣傳諭勒保松筠吳熊光曰朕聞從前

湖北教匪竄赴孝感時經過各處多被焚掠獨隨
州一處未被賊擾因該處民人於賊匪未來之先
預掘深溝堆疊土山賊既不能踰越溝壕擾害村
莊而該民人佔據土山足資捍衛是村莊守禦既
嚴賊匪亦無由肆掠復有官兵追躡其後未有不
窮蹙潰散者此亦保護地方之良策行之已有成
效若川陝河南等省各處村堡俱能照此預爲防

範何至任賊恣意蹂躪乎著勒保松筠吳熊光等飭令所屬地方曉諭居民相度地形或可仿照辦理令鄉勇人等加意護防堅壁清野以期賊蹤歛戢不敢肆行侵擾於堵剿機宜自爲有益

臣等謹案用兵之道當賊匪據險召嶠則以摧堅克敵爲要若遇往來竄擾之時則令村莊百姓自爲守衛使之無路焚掠而後官兵

乘勢躡擊鮮有不窮風潰散者此戰守機宜
所爲相輔行也而我

皇上鈐符在宥

籌念戎功而又

博諮廣採以隨州守禦有方

諭令各督臣曉示地方仿照辦理厥後三省團築寨
堡大著成效以堅壁清野之法掃除數十萬

兕徒仰見

睿謨灼見所以靖邊陲而登衽席蓋莫不秉於

先幾之指授也

初四日

辛卯

明亮與肇奏言

臣

明亮會晤永保公

同籌辦永保暫住鳳縣料理京餉入川卽於

臣

所帶原兵內抽撥五百各派索倫馬隊五十名

暫留護送餉鞘

臣

等卽追擊張逆前進途次接

聞新來山東官兵細冊自署副將四達色以至
守備千總大半皆係試用署理人員不能約束
官兵特派鎮臣長春由棧道馳往迎管並令沿
途聲言自東省新派七千官兵已至西安令地
方官妥爲預備則賊匪聞風自不敢向藍田一
路窺伺西安省城查張漢潮自甘省邊境截回
仍由七盤溝五道梁一帶老林山內漏夜狂奔

訊據獲賊供稱張漢潮引誘官兵追入深山或由馬道驛或由沔縣折出仍欲搶劫餉鞘騾馬由長寨過江會合川省賊匪

臣

查該匪所竄路

徑萬山重叠我兵卽能趕上亦不能痛加洗剿而人馬轉形疲乏且褒沔一帶人民不時驚慌設或賊匪乘間突出官兵一時不能繞至賊前致令會合張映祥股匪則賊勢未免鴟張

臣卽

由褒城沔縣漢中城固洋縣確探緊追追馳至

五郎賊匪已由彼向東北捷竄正在追剿間接

到勒保來咨以

臣

一旅之師不敷剿辦卽於恒

瑞憲成所帶官兵一萬六千餘名內抽撥雲貴

四川官兵三千名前來協剿但此項官兵尙在

甘省一時緩不濟急

臣

兵力雖單萬難等候卽

從前奉派陝甘補額官兵一千餘名亦未到來

隨於途次飛咨恒瑞永保等上緊催撥

臣

查五

郎爲適中之地卽留鎮臣關騰暫住收集以上

兩項官兵並飛咨永保俟餉鞘籌撥事竣卽移

駐五郎設賊匪折回便可迎截夾擊一面飛咨

河南撫臣吳熊光嚴密防堵以期兩面合剿

臣

卽由鎮安山陽尋蹤躡逐或抄道截擊或分路

兜圍雖曰有擒獲總不能制其奔竄之路且張

逆股匪見臣馬隊一到卽亡命飛奔十八日趕

抵南州適長春帶領東省官兵到來該兵丁等

多係新募補額未經訓練不聽約束自長春責

革一二千把案兵始稍知斂跡十九日馳抵龍

駒寨該處人民稠密賊匪正在窺伺臣帶兵趕

到殺賊一百餘名擒獲賊匪探馬十七名訊知

張逆等商量到此搶掠騾馬思欲奔赴河南當

又飛咨吳熊光嚴飭官兵迎探堵剿

臣

卽督兵

馳抵大商原追上賊匪後隊沿途趕殺百餘人
生擒六十七名乘隙救出被擄百姓二百餘人
發交隨營知府趙洵分別辦理二十日該匪直
撲樂莊營卡該處係陝豫接壤經吳熊光預派
張文奇在接壤之地擇要防堵賊匪見樂莊兵
單四面圍撲官兵盡力施放鎗礮滾石擲打殺

賊甚多正在喫緊之際張文奇趕到臣前隊探

路馬步兵勇亦抵該處賊匪一見卽四散奔上

左邊大山梁遊奕臣督兵趕至時已戌刻該匪

卽由旁徑翻越界嶺奔竄臣乘夜冒雨進追趕

至牌樓溝口賊匪分爲三起狂奔希圖牽綴追

兵使人莫辨首逆所在有矛手二百餘人向朱

陽關奔竄業經豫省防堵之都司蘇大雄等帶

兵追擊其男婦老幼自北山陡壁扒越遁走張

文奇已帶兵前往抄擊至大股賊衆由西溝奔

竄計首逆必在其內該處係四達之區東北界

連南召南陽東南卽是浙川盧氏均係豫省富

庶之地若被賊匪蹂躪則逼脅自衆臣明亮督

率愛星阿侍衛莫新等由茅河抄出賊前臣興

肇督率侍衛墨臣保副將多爾濟札普等由燕

子河分道抄擊賊匪正在彼處擄人掠食經兩路官兵突出立斃一百餘名賊衆合成大隊搖旗直撲臣明亮親率愛星阿等帶領索倫馬隊馳射衝擊斃賊一百餘人賊始大敗分尋險路扒越臣等窮兩晝夜之力隨剿隨進始將該匪逼回陝境逃遁此次豫省派撥官兵均屬奮勉已咨吳熊光查照鼓勵一面撥兵搜捕山林內

打散餘賊共獲掌旗頭目薛成章王思金二名
並餘匪黃文禮等七十三名內從張漢潮起事
以及與官兵打仗者二十七名概予嚴誅其餘
被擄未久者均交地方官妥爲安插現據差探
稟報張漢潮等三股賊匪至桃坪仍合一處由
商南雒南前竄臣查賊匪回竄之路勢必仍走
五郎一帶計此時關騰催收調撥兩項官兵諒

已到齊復又飛咨永保督率官兵卽在五郎一帶迎剿可得前後夾攻以期早滅此股賊匪所有打仗出力各員謹開單呈

覽奏入

上命軍機大臣傳諭明亮曰閱所奏打仗情形均已據吳熊光奏報而賊匪之折回西竄未能深入豫境者皆由吳熊光分派官兵三面嚴堵是以賊又

向西奔回尙爲明亮之功乎今明亮因屢次打仗
得勝遂謂賴伊兜截得以逼回陝境所言殊屬無
恥且張漢潮老病無能奔竄窮蹙昨在豫境又身
受鎗傷諒無難迅就擒獲若祇剿殺賊夥不能卽
縛渠魁豈不復蹈三年來怠玩積習乎至摺內稱
賊匪回竄必由五郎已知會永保前後夾攻一節
亦係照常敷衍之語賊至豫境時吳熊光分派豫

兵于南北東三面堵截明亮在西面追躡如此四
路合圍尙任張漢潮竄回今祇前後夾攻寧不能
從旁奔逸各路剿賊摺內多有此四字明亮沿襲
套語入奏亦可謂數見不鮮矣總之賊匪一日不
平地方良民一日不能安業雖賊衆多有裹脅附
從之人然任賊往來奔竄以不殺爲陰功則生靈
慘遭荼毒領兵者造罪更大惟當速剿賊匪拯救

難民以殺止殺其功實大明亮等不可不知也此
次打仗未能卽擒首逆雖未滿意而將領弁兵等
連夜冒雨進攻不避艱險實屬辛勤勇往已分別
加恩鼓勵至若豫兵出力之處與明亮無涉吳熊
光奏到時卽已加恩矣所有新調之山東官兵未
諳軍紀桀驁不馴到營時明亮須申明約束馭之
以嚴不可致令滋事

上諭內閣曰此次索倫協領秦巴圖等在樂莊西溝
一帶連夜冒雨殺賊不辭艱險實屬勇往協領秦
巴圖著賞給額騰依巴圖魯名號遊擊應元寬著
賞給濟特庫勒台巴圖魯名號叅將楊奎猷遊擊
張元麒著賞戴花翎遊擊游棟雲守備陳應彪著
賞換花翎索倫驍騎校杜爾博等十一員俱著賞
戴藍翎以示鼓勵

同日松筠奏言查陝省三張逆奔竄無常除翻
山越嶺行走趨捷之外別無長技其各股賊首
亦非必有智能不過指稱一人爲首虛張聲勢
是以賊首名目亦無定准如入甘賊匪前此指
名張映祥爲首今各路軍營拏獲賊匪訊據供
稱藍號賊首本係張士龍張士虎白號賊首係
張金奎楊天柱楊開甲等並無張映祥其人或

係已死或係詐名賊情狡獪隱現不定均不足
據惟在領兵大員鼓勵兵勇或分路設伏截剿
或兩夜出奇掩擊似無難尅期蕩事現在白號
一股經恒瑞在太平河一帶截擊之後折入階
州西和境內復被廣厚吉蘭泰於徐家壩地方
潛襲賊營餘匪三千餘人於西河禮縣一帶奔
竄有廣厚帶領撒拉爾回兵同吉蘭泰索費英

阿分路堵剿至藍號一股竄近陽平關爲白龍江所阻未能闌入川西亦幸富成從階州繞赴南面連次截剿賊乃北竄高山老林探知已乏食恒瑞分派官兵駐扎白馬關瑤坪一帶賊匪不能竄赴陝境現在竄入黑馬關一帶山林之中恒瑞帶兵在米倉山賈家店等處探赴剿辦甘省之賊似可以次肅清其張漢潮一股賊

匪自兩富縣被恒瑞截回陝境後由城固洋縣
五郎鎮安等處竄近商雒如被官兵堵截不能
闌入豫省仍應防其折回西竄來甘與白號會
合如果折回西竄必經由鎮安及洋縣之華陽
城固之小河口若於此三處撥兵駐扎以逸待
勞別遣輕兵躡追牽制俟其來而迎擊必可得
手而兵力不敷分佈臣現與恒瑞熟商將富成

之兵分起遣赴漢中整頓衣履器械就近交永
保管領堵剿諒不至久稽時日其徐添德等各
股賊匪昨雖闌入紫陽安康交界已經總兵慶
溥柯藩道員溫承惠等分投堵截德楞泰亦帶
兵由川趕入陝境抄擊現據探報徐添德樊人
傑等均已折回川境臣仍卽飛札王文雄慶溥
柯藩溫承惠等鼓勵兵勇各於要隘處所實力

嚴防但能保固疆圉不致川匪竄入卽是伊等之功無需越境邀擊也

松筠又奏言竊

臣

欽奉

諭旨將富成革職拏問就近提訊遂於接印後馳赴

西和禮縣嗣聞藍號賊匪從階州折竄陽平關

富成已繞向南面兜截

臣

亦改道東南於二十

一日行抵晷陽探知富成在黃家坪大水溝等

處連次打仗皆有斬獲惟聞其所帶兵丁甚屬
疲憊行走緊急糧運艱難兵勇間有乏食時候
而雨水泥濘山路崎嶇連日奔走兵丁多有跣
足包以牛皮者自應卽爲整頓以期得力現在
恒瑞已從長壩向南截擊藍號賊匪是此股已
有大兵剿辦臣一面嚴飭各州縣催運米麵趕
緊接濟派委員弁分赴漢中各處購辦衣履等

物一面飛調富成之兵趕到畧陽稍爲休息將
衣履器械整頓完好卽照勒保原奏派赴陝省
會剿張漢潮一股俟兵丁到齊分派停妥另行
奏

聞茲於二十四日富成聞調趕至畧陽臣當卽宣
旨革去翎頂摘取印信將

諭旨內指出各情節逐一嚴詢據富成供稱我係滿

洲世僕受

恩深重帶領多兵不能趕緊殺賊及早蕝事上煩

聖慮理應卽行正法今蒙

皇上天恩不卽置之重典傳

旨訊問我自十九歲當兵出征西路雲南金川等處

從未稍有退縮今由總兵提督擢任將軍尤應

感激思奮更何敢心存滿足推諉玩視總緣聞

劣無能惟知一味追賊有時抄道迎截無如賊
匪狡獪探知前有官兵立即折回或翻山旁竄
又成尾追總未能痛加殲戮每次所殺賊匪實
在不多心中著急無顏奏報仍照在四川時具
報經畧實是我糊塗該死至於兵丁饑瘵情形
雖州縣日日運糧緣賊蹤無定行營亦無定所
米麵必須駝負迨探知軍營所在將近趕到賊

匪已經逃竄不但不走大路且不由小路竟自
翻山爬巖深林密箐隨欲隨行官兵只得跟蹤
緊追不及等待其運來糧米又須覓道繞送往
返迂迴又趕不上故不能按日支領只得零星
在就近村寨採買散給不得飽食皆屬實情我
原帶山東兵三千五百名向在兗州鎮任內管
教熟習故於湖北四川打仗甚屬得力因陞任

四川提督將軍此次來甘帶領四川貴州雲南
洮岷河州各營兵丁並河南四川貴州各處鄉
勇通共七千餘名除傷亡病故外現存兵三千
九百八十名鄉勇二千三百九名各有將備管
領語言性情不一我又無能妥實訓練以致打
仗常不得力又隨帶駝騾甚少鑼鍋帳房一切
多係兵丁自行背負行走未免艱難到打仗時

先到者不過二三千多人山路崎嶇每遇雨水泥
濘催令奔走衣履易於破壞兵丁多有跣足或
用牛皮包裹行走每以好言勸說兵丁亦知感
奮近日於黃家坪大水溝黨家坪蔣家山毛垵
山連打數仗尙能奮勇殺賊但斬獲之數仍復
無多已於本月十五二十一兩日具奏究竟不
能痛加剿殺心中愧恨交集至兵丁沿途俱知

守法惟鄉勇人雜乏食之日不無搶奪強買情
事我曾隨時懲治在成縣里落溺將四川鄉勇
李五正法又在禮縣孟家梁將河南湖南鄉勇
張文學董受林正法其割耳插箭捆打示懲者
尤多實不敢縱容騷擾百姓但不能預爲防閑
約束就是我的不是只求將我從重治罪等語

臣
自入陝境卽聞其帶兵剿賊徒事戾追今經

遵

旨嚴查審訊始知兵力疲敝實在情形除富成經過
地方州縣運糧有無玩延容俟嚴查辦理外富
成身爲將軍受

恩深重如果自揣才力不勝卽應早自陳奏至於驟
腳衣裝軍行官員所必需亦並不奏明添給咨商
製辦因循耽延以致兵力疲敝不能迅速歲事

實屬罪無可辭謹訊取確供先行具奏一面委
知州張利溥都司米章將富成押解赴京送交
刑部恭候

諭旨辦理其成都將軍印信俟慶成到陝卽行委員
賫送奏入

上命軍機大臣傳諭松筠明亮慶成永保曰松筠奏
設法剿堵情形所辦俱合機宜各路賊匪本無畏

技不過恃行走趨捷到處狂奔其各股賊首亦無一定名目不過指稱一人爲首虛張聲勢現在白號一股經恒瑞擊敗後奔竄西和禮縣一帶已有廣厚吉蘭泰等帶兵堵剿藍號一股由米倉山南竄未致闖入川西賊勢已就窮蹙惟在帶兵各員相機辦理堵剿並用斷不可徒事尾追疲勞兵力現在所調各兵自己陸續到陝倘必須再添生力

精兵卽據實速奏以便酌量調撥如已足敷剿捕
實可無庸添調亦卽奏聞至富成怯懦無能實有
應得之咎但各路剿賊皆蹈尾追之弊縱使富成
能抄出賊前而賊匪一遇官兵折回旁竄又成尾
追之勢不得以此獨罪富成一人其不能約束兵
勇一節據伊供明因鄉勇搶奪強買節次正法三
人割耳插箭細打者尤多尙非富成全不管束此

等鄉勇藉端生事各路諒所不免亦不得以此入
富成之罪惟伊帶領一路官兵剿賊僅以具報經
畧爲詞數月之中全不自行陳奏實屬糊塗已極
經畧與帶兵大員均在一路或同在一營自應歸
經畧一人奏事今富成與勒保不但各爲一路且
在隔省地方若將軍情報知經畧轉奏豈不更爲
迂遠伊係將軍大員竟不仰體朕盼捷殷懷實不

可解伊在甘省剿賊或不知四川軍營隨時奏事
而恒瑞明亮廣厚等各路具摺伊豈毫無聞見富
成似此昏憤斷難勝大員之任伊之獲罪卽在乎
此現在松筠已將富成解交刑部治罪想伊到京
所供亦不過如是則別無他罪可擬富成年力就
衰且曾經受傷所帶兵丁奔走疲乏自屬實在情
形近日富成尙能勸勵兵丁在蔣家山等處打仗

截回藍號賊匪不使竄入川西卽此一端尙可加
之寬貸况伊帶兵日久究係軍營熟手富成著加
恩免其治罪作爲披甲留營帶兵以觀後效如此
時業已起解仍行截回於松筠慶成明亮永保四
人軍營何路較近卽將富成交與該一路軍營差
遣効用如能自知愧懼勉贖前愆著據實奏聞尙
仍前畏葸不思認真出力卽當嚴叅治罪

初五日壬辰王永保奏言臣接奉

諭旨令在陝省東南邊界堵剿張高二逆與倭什布
夾擊維時正值張映祥張漢潮二逆在陝省北
棧東西兩面游奕滋擾臣帶兵在鳳縣留壩一

帶棧內堵截係在陝省西面邊界其平利縣在
陝省東南邊界中隔漢江相去千餘里此處正
當喫緊之際臣未敢拘泥遽赴東南旋據平利

稟報賊匪又西竄安康境內平利已無賊蹤嗣
復接奉

諭旨以留壩兩當一帶又關緊要命臣毋庸拘泥前

旨仰見

聖明洞燭機先因時指示伏查陝省南面一帶西自
寧羌至迤東南鄭西鄉紫陽安康平利等州縣
之南界與川省廣元南江通江巴州太平大寧

等州縣之地界毗連而平利係東南極邊之一隅東面又與湖北竹谿連界川省賊匪被剿緊急或在兩省交界之深林密箐藏匿潛出窺伺或入陝境滋擾是以南面一帶有提督王文雄總兵柯藩慶溥分帶官兵在西鄉等縣南界分頭相機截堵該匪等不能深入陝境折回向東奔竄楚界楚省堵禦嚴密又復折回川境其來

往奔竄情形總無十日半月停留若見一股賊
匪退後緊追跟剿又恐他股乘隙闖入是陝省
之南面與楚省之西面總在堵禦緊嚴不令賊
蹤闖入則額勒登保德楞泰在川分領重兵剿
辦方爲得力現據王文雄柯藩慶溥咨報及各
縣稟稱近有由四川通江竄來一股賊匪至西
鄉簡池壩地方經王文雄分兵攔截仍翻出陝

境又樊人傑一股由太平竄入紫陽境內經柯
藩分兵防堵轟擊該匪復與龍紹周唐大信二
逆合夥翻越界嶺折回川境張添倫高均德二
股由平利安康折入紫陽盤廂河見北面有柯
藩官兵防堵亦翻界嶺竄回川省太平境內又
小藍號宋王二逆經慶溥堵截折入涪河亦由
兩扇門翻入川境刻下陝省南面境內已無賊

匪旬餘之後遇川省追剿緊急該匪等勢必復
圖奔竄是各匪情形雖較前散敗並無一定意
見決欲何往而其行跡所向詭詐狡猾實難預
揣至張映祥賊匪現在陝省之西面甘肅境內
分爲藍白兩號此數月內總在甘省之秦州階
州成縣西河文縣白馬關一帶來往奔竄該處
西南有白水江一道東南有嘉陵江一道現在

江水盛漲不能越渡聞恒瑞廣厚吉蘭泰觀祥
等均在東北兩面相機兜截其張漢潮一股賊
匪一載以來總在漢江之北陝西省城之南終
南山內蓋屋郿縣鄠縣五郎孝義鎮安商州雒
南山陽一帶州縣地方來往奔竄現在向東狂
奔已至雒南與豫省連界地方係在陝省之極
東邊界明亮已帶兵追剿其山東續調官兵已

經明亮調赴商州自可就近調遣此陝省東西

南三面之賊情並官兵堵截剿辦之現在情形

也臣現已將餉銀趲運出境帶兵東向松筠約

於三五日內亦可旋抵漢中臣路過時將應辦

一切告知並將軍餉等件交松筠經理臣卽趕

赴明亮一路並蒙

聖明鑒及陝省兵單派令慶成帶領直隸官兵來陝

協剿適又准松筠咨令慶成趕赴臣一路會同

辦理計六月望後慶成亦可到來會合剿辦更

資得力惟是現在陝省東西南三面俱有賊匪

奔竄處處均關緊要臣於陝西通省有地方之

責三面均應瞻顧張漢潮股匪雖已東竄仍在

陝省境內是以必須先行趕往亟圖會剿冀該

匪經豫省堵禦明亮兜截仍折回向西奔竄臣

正可迎頭截剿與明亮兩面夾擊但臣相離雒

南尙有一千餘里及至趕到彼處又不知情形

如何倘豫省未能堵截竟致竄入豫境臣臨時

斟酌情形或應直赴豫省會辦或又有別處關

係緊要必須趕往堵截卽一面奏

聞一面帶兵前往相機妥辦

永保又奏言川省餉銀前經臣改造小匣裝盛

分兵沿途安營護衛分起自鳳縣前進旋訊據
逃出被裹民人供稱張漢潮賊匪聞餉銀俱用
騾頭馱載意欲搶騾乘騎以便奔走等語該匪
等雖已東竄然既有窺伺之心防備更宜周密

臣

卽聚集兵丁紮營二三座其餉鞘騾頭夜間
俱於營內分派安頓不使散處催令餉銀併起
行走沿途分派官兵前後照料於十五日全數

俱出北棧已抵褒城縣正擬仍令分起向南棧
前進又據畧陽縣寧羌州稟報竄入甘省之張
映祥賊匪自甘省折回東南竄近陽平關一帶
查陽平關在南棧西面可通大安驛寧羌州之
大路餉銀一入南棧必須由大安寧羌經過住
宿又當亟爲籌備雖川省需餉不甚緊急然近
聞該省軍儲亦微有缺乏似未便遇事遲延且

餉銀早日出境騰出兵力臣尙須移顧他處是

以卽先帶兵趕赴大安紮營探聞賊匪雖竄近

陽平關離大路一百餘里而其間隔有嘉陵江

臣卽酌派將備帶領官兵在東岸水淺處分段

嚴密防守渡船俱移於東岸該匪等屢欲涉水

並假冒官兵喚渡均經官兵鎗礮擊退適大雨

決旬水勢陡發東岸又有官兵防守賊匪勢不

能越渡

臣

卽乘機催趨餉銀併起行走冒雨前

進已於二十六日全數均過寧羌出境抵川省

廣元縣之神宣驛

臣

已先委糧道張端誠前赴

點交川省亦派有知府丞倅各員在彼接收餉

銀隨到隨由朝天鎮下船裝載順流南下現在

河寬水溜行走迅速離張映祥一股賊氛更遠

前途無阻亦可計口而到至張映祥賊匪因陽

平關有備河水漲發不能竄出仍折回甘省階
州一帶彼處有恒瑞廣厚吉蘭泰觀祥等帶兵
截剿探聞松筠不日即可前來漢中

臣

現擬帶

兵趕赴明亮一路協剿再查健銳營正紅旗前
鋒叅領佛寧前因押送冉文儔首級赴京途次

接准惠齡行知截回行抵褒城縣因聞

臣

帶兵

前往華陽山堵賊佛寧卽就近同原帶之正黃

旗蒙古前鋒校達冲阿赴營跟隨打仗見賊匪
敗退卽趕上追殺不意失足陷入稻畦落馬賊
匪回頭用矛連戳達冲阿下馬趕救亦受矛傷
同時陣亡均奏入

上命軍機大臣傳諭承保曰此次鉤銀經由鳳縣一
帶賊匪意圖搶掠前經承保改造小匣俾得輕便
行走復隨處安營設衛催令遄行茲已全數出境

交川省委員接替前運不致稍有疎虞所辦尙屬
妥協前因陝省東南邊界一帶有一張高二逆滋擾
是以令永保帶兵前往與倭什布爲夾擊之計嗣
以留壩一帶正關緊要復諭永保自行酌量今永
保能不拘泥遠赴東南仍在西南一帶堵禦所見
甚是軍務移步換形斷不可拘泥遵旨現在賊勢
又與上月迥異永保自應由西向東進擊但據稱

擬赴明亮軍營協同剿賊此時永保距明亮處較遠且伊從前所帶官信之兵除疲病外堪以打仗者僅有千名倘途次猝遇張漢潮一股兵力無多豈能奮剿若再輕試其鋒稍挫銳氣更屬不成事體永保莫若就近先赴松筠一路或俟慶成到後一同帶兵或札商松筠酌量分給兵力以資剿捕總在臨時察看機宜固應注意張漢潮速擒此賊

以洩衆憤尤當加意慎重議定後戰不可輕率從事急欲見功也至通江賊匪一股竄至西鄉簡池壩地方經王文雄分兵攔截仍翻出陝境其樊人傑一股由太平竄入紫陽境內張添倫高均德二股由平利安康折入紫陽盤廟河俱經柯藩分兵堵擊折回川省又小藍號宋王二逆經慶溥堵截亦已翻回川境是此時陝省南面境內已無賊匪

其折回川境各股勒保正得併力剿辦聚而殲旃
此卽係王文雄柯藩慶溥之功至前鋒叅領佛寧
前鋒校達冲阿因趕殺賊匪受傷陣亡殊爲可憫
俱著咨部賜卹

欽定剿平三省邪匪方畧正編卷一百五

已未年

六月初九日

丙申

福寧景安奏言

臣

等接據太平

總理同知淡士灝等稟稱張子聰等逆昨竄入

通江分作三股奔逸額勒登保現由柳林溪一

路前進相機兜擊至德楞泰所剿龍紹周樊人

傑各匪復從陝西紫陽界嶺折入太平仍向城

口竄匿德楞泰已由陝西六道河躡剿前來查

兩起官兵不下二萬需糧實多前經飛檄通江
南江巴州等處協力轉輸以供額勒登保一路
官兵之用其德楞泰軍營所需兵米全賴太平
供送而太平之糧必須達州東鄉源源撥解方
足以資接濟嗣因太平之長壩青花溪一帶運
道梗塞經勒保派令副將褚大榮帶雲貴新兵
二千餘名前往疏通道路業已肅清糧運均可

通行無滯前差解額勒登保軍營銀二萬兩及
角弓等項行次通江黃連埡地方猝遇賊匪當
卽折回民寨暫住適勒保派委叅將張良槐帶
兵二千名前赴額勒登保一路協剿道經黃連
埡一聞餉銀被阻當卽趕往救護立將賊匪擊
退銀兩得以迅速抵營用濟要需惟賊蹤詭秘
往往於官兵過後旋即四出紛擾冀圖擄掠頃

據通江縣知縣徐廷鈺稟報該縣草石壩雙灘
子等處俱有賊匪滋擾後路時梗時通

臣

等復

一面諄飭承辦各員凡遇滾運各營糧石務宜
倍加慎重免致疎虞又包正洪一股賊匪經總
兵朱射斗帶兵跟蹤剿現復追至隣水大竹
境內其兵糈已令附近各州縣四路妥速運供
此外如大寧奉節凡有竄匪地方俱經預飭各

州縣於師行必經處所擇險要寨洞備貯軍糧
俟官兵入境卽可隨地支放俾免臨時周章

臣

等前因存餉告罄新餉未到無項可支經藩司
林鶴用印票在省城各舖戶奏借銀六萬兩解
送達州暫爲敷衍茲部撥餉銀據報已入川境
一俟解抵達州卽可將兩月以來各營未領之
項次第找發並將借項清償但年來川省軍費

實屬浩繁

臣

等惟有加意撙節覈實支應其糧

石亦卽嚴飭各站員妥爲護解設法躡道運送
並查上年採買穀石除節次碾運外止敷數月
之需察看賊勢情形尙須預爲籌辦奏入

上命軍機大臣傳諭福寧景安曰福寧等奏籌運糧
餉情形額勒登保一路軍營祇解過銀二萬兩伊
所帶兵數不減於德楞泰且亦有吉林黑龍江官

兵在內而供支銀數如是之少則德楞泰之浮冒更無從置辯矣至所稱藩司林傳用印票在省城各舖戶借湊銀六萬兩解送達州一節此係權時濟用則可究非良法昨據永保奏餉銀已全數入川計此時可陸續前抵達州所有前借舖商之項卽應還給仍須派令妥員按各舖戶照數清償毋任經手吏胥從中藉端弊混致滋擾累至各處賊

匪蹤跡靡常今野無可掠更欲窺伺官項冀圖劫奪不可不倍加慎重福寧等務須嚴飭各該運員小心護解勿稍疎虞此時各路軍營雖不敢如從前之以歌童舞女飲食宴樂任意濫支濫用但一切支發總宜核實撙節至此次派令景安赴川辦糧不過予以自新之路其籌辦轉輸供應等事焉能如福寧之熟習景安係棄瑕錄用之人尤當痛

自後改幫同認真辦理無負朕宥過施恩之意

同日慶成奏言臣前於井陘途次經督臣胡季

堂派撥頭起官兵交臣帶領由晉兼程前進於

五月二十七八等日已抵潼關其由豫行走之

後起官兵係自直省間日起程途次遇雨泥濘

尚未到關臣差弁飛催於六月初一初三等日

二三兩起到來其第四起日內亦可趕到現在

潼商道委員照料按起酌給夫騾馱載臣點驗

齊全申明紀律帶領進剿茲探聞張漢潮一股

由商雒一帶奔至豫屬盧氏邊界雖經兵勇堵

截適遇大雨連綿溝溪水漲折回陝境該匪等

連年竄匿陝屬之商雒鎮安孝義一帶翻越崇

峻嶺輾轉牽誘以勞我兵明亮急趨窮追兵

力漸疲幸邀

皇上洞燭機先添給山東補額之兵又蒙派臣帶領

直隸兵一千六百名前來協剿但張漢潮等狡

獍奔馳異於他賊近日裹脅匪黨較多愈肆狂

竄屢被蹂躪之處人民遠避糧食稀少無可搶

掠揆其詭計非逃向豫楚勢必復竄距省較近

之盤屋鄆縣郟縣一帶市鎮滋擾陝西腹地有

此竄匪不獨隣封各省均須設防而剿辦川匪

亦多掣肘此當亟應剿除若僅一兩路單弱之

兵徒事追躡恐又陷牽綴疲勞之弊

臣悉心籌

度必須各路厚集兵力兜截殲剿使賊不能遠

遁震懾渙散即可迅速撲滅前額勒登保等剿

盡羅丹冷等逆亦藉重兵合力是其明驗現在

川匪未淨漢江一帶扼要防兵自不可疎而張

映祥一股竄匪又在陝甘邊界恒瑞帶兵剿捕

喫緊均難分力兼顧茲山東兵旣赴商雒明亮
處兵力較前稍增並聞松筠自甘回陝後永保
亦卽由漢中前來協剿臣一俟兵齊卽帶領由
南山一帶探迎賊蹤剿辦並知會明亮永保相
機併力合擊期於一鼓殲盡奏入

上命軍機大臣傳諭慶成曰慶成一路所調直隸官
兵已接續可抵潼關慶成以張漢潮狡獪奔馳異

於他賊急應厚集兵力兜擒截擊所見甚是剿捕
賊匪全在合集衆兵併力兜擊方可集事若不察
度賊情祇就現有之兵隨帶前往急欲殺賊邀功
究不過與賊匪零星打仗而兵力不足豈能一鼓
成擒於事仍屬無益今慶成於直隸官兵未經到
齊之時畧爲停待一俟各起兵丁齊集再行探蹤
迎剿似此養精蓄銳並不急於見功方合機宜此

時直隸兵自己到齊慶成惟當與明亮永保合力
奮擊將首逆張漢潮剋期撲滅朕必加以懋賞現
在張漢潮屢經敗竄勢已窮蹙慶成等進擊時如
有從賊打仗臨陣始行棄械投出者皆係黨惡匪
徒法所必誅不可輕聽受降致留餘孽如實係裹
脅難民自行投出者仍當妥爲收卹至慶成如能
將張漢潮速行擒獲後其應往何路協剿之處朕

亦不爲懸定或卽帶勝兵與恒瑞夾擊張映祥一
股或先向東南擊剿張添倫高均德等竄匪倘其
時藍號白號等股賊匪業經剿竣慶成等卽徑赴
勒保軍營會剿川省各股賊匪自更得力惟在察
看情形相機迅勉也

同日廣厚奏言白號賊匪經

臣

在勾旗寨剿敗

後冒雨狂奔撤縣之麻陽河沿途並不停留卽

時南竄大河店臣料其情急必由白水江逃竄

人陝隨即一面躡蹤緊追一面知會吉蘭泰自

武家坪進兵兩路夾攻及臣兵抵楊家灘賊匪

正欲過渡都司張廷相署同知縱司燁署縣丞

席濂首先趕到即率兵用鎗礮轟打賊匪慌亂

遂沿江而上奔赴虞關臣帶領都司陳五輯署

知縣李世華等隨後掩殺該處山徑險仄賊匪

擁擠踐踏人馬滾下懸岩跌斃甚多吉蘭泰已
由武家坪帶兵前來正與賊匪迎面率領遊擊
閻燮和都司來興等奮力截殺

臣

復派令遊擊

和保守備敖世俊帶兵四百名馳赴莫家坪小
路兜截就近策應賊匪見我兵三面圍捕鋌而
走險捨命向白水江淌渡多被衝沒我兵乘勢
逼趕又復擊斃多名其幸得過渡者情形極爲

狼狽奔竄畧陽縣之九股樹中三川等處其勢
仍係趨向川北不致闖入川西完善之地此次
共斃賊匪約五六百名本地被裹之人乘間逃
出者二百餘人生擒黃喜友等男婦六十一人
訊知楊開甲張金魁因屢被官兵剿殺折傷戰
手已多甘省被擄之人又逃散將盡急欲逃回
四川本擬由楊家灘渡口搶船過江經官兵追

殺探聽得虞關水勢尙淺所以拚死奔來搶渡

當將黃喜友等正賊三十五名正法其呂成等

男婦二十六人均係本省良民當卽釋放

臣查

徽縣所屬虞關一帶山深林密恐尙有餘孽潛

藏現在分派將備四路搜捕務使根株淨盡綏

靖地方

臣卽遵

旨與吉蘭泰分駐要隘以防此股賊匪復行折回至

鞏秦階各屬疊遭賊匪焚掠居民顛連失業深
堪憫惻幸入夏以來雨水優渥二麥豐稔

臣已

出示曉諭令百姓趕緊刈穫趁早復業再藍號
賊匪自竄過階州佛入崖後尙在與階州毗連
之陝省寧羌州楊家壩等處恒瑞率同總兵觀
祥剿辦又總兵索費英阿帶兵一千五百名經
松筠飭令亦由階州探蹤堵剿自可不致折竄

臣仍隨時差探如藍號賊匪尙未竄遠卽當與吉蘭泰酌分兵弁帶往截擊俾甘省一律肅清奏入

上命軍機大臣傳諭廣厚曰此時甘境已無賊匪但賊蹤往來無定而蘭州省城現有楊揆蔡廷衡在彼足資彈壓廣厚吉蘭泰不必卽回省城仍當在甘省邊界一帶駐劄防堵設有敗竄賊匪仍行折

回廣厚等卽可迎頭截擊但亦不必越境追剿並
不必遠及陝省廣厚等現在帶兵剿賊非如松筠
之身任總督必須兼顧陝西者可比惟當嚴防本
境不使賊匪復行闌入以期綏靖地方至撒拉爾
回兵此次摺內未將伊等是否出力之處提及該
回兵等從前告請來營原資剿捕之用今甘境已
就肅清止須安營駐守自不必令伊等一同在彼

開住但既已遠來如有出力者亦應量加獎賞著
廣厚查明此項兵內若有實在奮勇出力之人卽
行奏明賞給頂戴以示鼓勵並著廣厚察看情形
如該回兵已無需用之處卽厚加賞資遣令回歸
本處倘藍白二號賊匪尙有窺伺甘境折回之意
勢須多兵剿捕卽將該回兵等仍暫留營應用亦
無不可總在斟酌妥辦不可拘泥

上又諭內閣曰白號賊匪經廣厚帶兵追擊在虞關
地方掩殺多名吉蘭泰亦帶兵前來迎擊賊匪逃
向白水江淌渡多被衝沒我兵乘勢追剿賊匪窮
竄畧陽地方不敢闌入川西完善之地此皆廣厚
吉蘭泰二人之功深爲可嘉著交部議敘以示獎
勵

十二日

巳亥

明亮與肇奏言查張漢潮股匪因追

兵緊急仍由商南雒南尋覓山徑分股亂竄連

日臣等兼程追剿不與以暇新到東省官兵未

能全數趕上卽現到數百名翻山越嶺亦不能

如陳兵之趨健臣趕緊進剿勢難稍待仍令鎮

臣長春在商州收齊帶領前來初二日臣馳抵

膠樹坪探得賊匪又復分起狂奔其頭股由紅

門寺折回後股由米湯河遁走均於牧護關會

合向東北逃竄屢據獲賊供稱張漢潮誘官兵
入山知商州以北兵守空虛且處處可通豫省
是以分爲兩股奔竄意欲牽綴追兵該逆籍隸
襄陽其由豫回楚之心蓄意已久且現竄之路
又復逼近商州當卽飛飭長春將現帶東省官
兵於商州入豫之泥峪口牧護關等處擇要堵
禦並嚴飭商州知州陳祁帶領壯勇協力防堵

臣亦連夜趕回秦嶺口攔剿次日該匪竄至牧

護關聞有兵勇堵禦復折回米湯河經臣前隊

兵勇擊剿衝殺五十餘名賊匪正在抗拒間遙

見臣帶領馬隊從山而下卽四散奔逃飛卽督

兵緊追擒殺七十餘人餘匪均由隱峪口西竄

該處離西安省僅百餘里附近村莊稠密恐逼

近省垣民心惶惑一面飛飭藩司馬慧裕臬司

台斐音鎮靜堵禦曉諭居民勿稍驚慌是夜二

鼓發兵臣明亮親率愛星阿侍衛鄂爾綏等帶

領馬隊由石灰場進剿臣興肇督率侍衛墨臣

保副將多爾濟扎普等由觀音廟進剿黎明馳

抵湯峪口賊匪前隊在高山望見飛卽遁走其

後隊三四百矛手尚在張家寨擄掠一見官兵

卽四散爬山遁逃經兩路官兵兜擊並有本地

百姓數百人隨同齊力追殺共殲戮賊匪一百
餘名復於林箐內搜出賊匪黃潤等六十三名
發交知府趙洵分別辦理臣仍督兵追至秦嶺
沿途擒殺五十餘名餘匪仍跟賊衆大隊翻嶺
南竄伏思張漢潮在各股賊中最爲狡猾其伎
倆不過向無兵處所往來遊奕一經趕上東擊
西奔南截北遁且分合無常詭詐百出總因陝

省路徑紛歧到處無兵攔擋不能制其奔竄之路今蒙

恩添派陝甘山東補額新兵二千餘名復

命慶成帶領直隸官兵一千餘名並永保帶領官兵

均歸臣一路協剿又准勒保奏撥恒瑞處四川

雲貴官兵三千名此時惟東省官兵甫經趕到

臣已派長春帶領在後趨行以上各項官兵尙

未到來而統計全數已一萬有餘兵力不爲不壯若卽分爲兩三路進剿亦不能制其四竄之路惟有通盤籌畫堵剿兼施以期尅日蕝事

明亮又奏言查陝省地方遼濶正南自漢陰石泉城固洋縣漢中以至棧道正北自鎮安五郎山陽商州商南雒南以至河南正西自孝義藍田以至西安西南自盩厔鄠縣郿縣寶鷄鳳縣以

至甘肅週圍綿亘數千里賊匪盤繞折竄於萬
山之中官兵徒事追剿勞而無益卽分兵兩三
路截擊或稍有遲滯亦不能制其奔竄臣追擊
賊匪往來數次目覩情形莫若將賊匪必由之
要路四面嚴密防堵各路專派大員帶兵往來
稽查截剿以專責成另派兩路官兵緊躡夾擊
不但官兵不能受其牽綴之累而賊見到處有

兵又有緊追官兵其伎倆亦無可施則擒渠掃
蕩指日可期查各路防堵官兵若不多派祇能
堵禦不能截剿仍屬有名無實而從中緊蹣夾
擊官兵若非稍知軍旅不辭勞瘁之人統領亦
不能得力臣一路官兵追剿日久習勞已慣慶
成打仗奮勇熟悉地勢臣與慶成各領兵三千
各分注兩路從中會合夾擊至於石泉漢陰城

固洋縣漢中一帶山內緊要約需兵二千五百
名擇要堵禦另派一大員帶兵一千五百名駐
紮適中之地往來稽查堵剿遏其南竄之路鎮
安五郎每處各撥兵一千名堵禦另派鎮將委
員帶兵一千五百名往來稽查堵剿遏其折竄
之路商州商南雒南山陽每處各撥兵一千五
百名往來稽查堵剿遏其北竄豫省之路孝義

藍田就近交西安藩臬兩司撥兵防堵遏其西
竄之路若兵不敷用臨期可調撥山商一帶官
兵協剿如此四面嚴密防堵稽查協剿各專責
成如有實心出力者逾格保奏如有托故畏葸
者指名嚴叅則官兵各思奮勉於堵剿實有裨
益查豫省各處派撥官兵原爲堵截張逆而設
與其分撥各西安臨兵分見單莫若移至商州一

帶分設卽派張文奇田永桐領兵稽查協剿使
賊匪不能至豫省界內誠爲事半功倍計豫省
防堵之兵可得三千餘名臣等各處新陳官兵
共有一萬三千餘名除分撥堵剿外尙不敷二
千餘名一俟官兵到齊再行酌量增減以敷堵
剿之用奏入

上命軍機大臣傳諭明亮曰明亮係素習軍旅之人

從前隨同阿桂屢次出兵且曾獨當一面今剿辦
張漢潮一股賊匪並非大敵豈可任其東奔西竄
日久總未成擒本日所奏打仗情形仍係敷衍塞
責甚不滿意其籌畫分布要路各事宜于南路北
路西路及東北各緊要處所派兵分投堵禦並各
派大員帶兵往來稽查扼其奔竄之路以專責成
如此四面堵截明亮與慶成再各領官兵分兩路

從中夾擊布置尙爲妥協若將來賊匪於何路逸
出卽惟該處領兵大員是問其官兵防堵之地必
須擇人烟稠密處所屯劄俾賊匪不敢至鎮市焚
搶所過不過窮山僻壤無可掠食自必日久疲敝
卽賊匪欲向村鎮搶掠官兵以逸待勞賊來卽擊
更可事半功倍至所稱調派張文奇田永桐至商
州分駐一節斷不可行朕節次降旨諭令各省督

撫俱於本省邊界防堵不得越境剿賊明亮寧不知之且明亮摺內亦稱張漢潮欲誘官兵入山乘間由豫省衝過逃回湖北今乃欲將豫兵移駐陝境寧不慮賊匪偵知豫省邊備空虛又復乘向東竄吳熊光現無兵力何以禦賊即使明亮與張文奇田永桐跟蹤追躡已在賊匪之後豈非驅賊入豫令其回襄陽本籍耶且張添倫高均德尙在陝

楚邊境遊奕此一賊之意亦刻思由豫逃回楚省
自必令賊夥探聽設聞知豫省無備向彼竄逸更
將何以禦之况豫省本境卽有土賊潛匿伏而未
動今見防兵遠出乘間竊發尤屬可慮明亮之意
祇欲以多兵剿辦張漢潮一股全不爲豫省計殊
不知陝豫俱關緊要不可顧此遺彼明亮久歷戎
行何憤憤若此至所稱山東新兵不如陳兵之語

尤屬非是明亮等所帶陳兵往來剿賊不無疲乏
豈有生力新兵轉致不如疲乏陳兵之理前此明
亮往往以兵力單薄藉口及至添調多兵又以不
能得力爲詞則必如何而後可耶設或因山東兵
力可以剿賊得勝明亮恐其分功故爲此語則居
心尤爲鄙陋本朝開國之初不過以一旅之師入
關定鼎康熙年間吳逆等構亂阻兵七省爲之震

動其時國家財力豈能如今日之充裕惟賴我滿洲勁旅以寡敵衆次第削平今剿捕教匪已逾三載調集數省官兵糜帑至數千萬兩尙未悉行撲滅至張漢潮已老病無能乘坐竹兜窮蹙奔逃且據明亮所奏賊衆祇有二千餘名明亮各路分布官兵有一萬三千之多卽此內有疲乏者計其得力之兵不下萬餘較之賊衆已及五倍若各兵齊

集後再不能一鼓殲擒則明亮何顏復行奏報卽有摺遞到朕亦不復批示任其所爲而已明亮著傳旨嚴行申飭伊接奉此旨當倍加愧勵務將張逆一股于兩月內迅速殲擒肅清陝境此時藍白二號賊匪俱已殘敗有恒瑞等在彼剿捕不日自當殄滅明亮等於剿平張逆後卽移師剿辦張添倫高均德一股以期剋日蕩事不得再有稽延示

啓

同日倭什布奏言查前竄竹谿邊界之張添倫
高均德等股匪於敗退後先後由陝省平利折
入川境內有一股竄及川陝交界之板篷子地
方因山深多雨未能遠遁折回平利繖子坪二
帶屯聚近復自老鴉絆東竄至石寨河換閣樓
等處距竹谿縣之西南河竹葉關等卡只數十

里臣於前月卽將沿邊營卡事宜逐一整頓現

值賊蹤逼近臣復往來各卡巡邏督率將備晝

夜堵守並酌量派撥兵勇分投協堵其川省大

寧賊股竄及大寧縣屬之草橋壩及奉節縣屬

之崇木嶺亦恐進竄楚界所有房竹與大寧接

壤處所臣亦嚴飭守卡員弁先事籌備守禦至

張漢湖一股賊匪經明亮等逼剿緊急竄至南

州商南境內楚省二鄖北面邊界毗連商南

臣

以竹谿邊境現有賊股竄近未便移兵前赴二
鄖已屢飭駐守鄖西縣各文武帶領兵勇實力
相機迎堵其鄖縣邊界飭遊擊郭廷振帶兵堵
守並撥兵五百名令守備張懷毓帶往策應設
該匪竄近亦足以資截剿奏入

上命軍機大臣傳諭倭什布曰張添倫高均德兩股

賊匪經官兵擊退後由平利折入川境近雖東竄石寨河等處距竹谿較近但該督早經先事豫籌前進圖說內分防布置情形甚爲妥協務須督率將備于交界處所實力嚴防以堵爲剿毋稍疎懈致令賊匪闖入爲要

同日吳熊光奏言連日各鎮將等帶兵于境外數十里之內搜捕餘匪均已肅清探聞張逆仍

由商州西竄鎮安一帶明亮等大兵緊躡追剿
臣於沿邊山徑村莊往來查看避難民人漸次
復業督飭陝州知州諸以謙盧氏縣知縣盧建
河等妥爲安撫民心已屬寧貼所有直隸官兵
已於初三日全數送出閩鄉縣境會集潼關慶
成統領前往張漢潮係老病受傷之賊今明亮
等又添此一路生力勁兵自可分路兜擒惟是

該逆蓄意逃回襄陽本籍必欲假途東竄是以
屢次拚命撲犯豫境雖節經官兵截退而賊蹤
飄忽路徑紛歧該匪往來既熟實難保其遂無
窺伺之心查西路邊界綿亘四百餘里祇就盧
氏所屬山路可通者四十餘處賊匪窮極狂奔
翻山越嶺是其常技是以上兩次楚匪至豫滋
擾時出入均由盧氏而此次張漢潮又由界嶺

之旁翻山闌入經官兵立時擊退是盧氏邊境
較之浙川尤爲緊要現在河北鎮臣張文奇率
同遊擊蘇大雄李正品等分帶弁兵於界嶺朱
陽關等處扼要駐劄防堵其荆子關西坪等處
本係南陽鎮所轄現有鎮臣田永桐率同叅將
蔡鼎德勝等帶兵分駐各專責成仍互相策應
其兵力不及之處臣復令按察使銜糧道完顏

岱南汝道陳鍾琛等挑練鄉勇分防卡隘以助
聲威佈置實已嚴密臣帶同林嵐等酌帶兵勇
暫駐盧氏不時確探陝境信息相機調度以期
綏靖疆圉奏入

上命軍機大臣傳諭吳熊光曰賊匪張漢潮前經吳
熊光督飭鎮將分投截剿折竄回陝今復於境外
數十里之內將餘匪搜捕淨盡所辦尙好此時豫

境雖已肅清民心寧貼張漢潮本係楚人其意總
欲竄回襄陽本籍邊境一帶仍當隨時留心防範
不可稍存懈怠該撫現派張文奇田永桐蔡鼎蘇
大雄等分段帶兵駐守並令道員完顏岱等帶領
鄉勇防守卡隘吳熊光仍在盧氏駐劄佈置均屬
妥協該撫務當督率將領綏靖疆圉再吳熊光前
奏訊據獲犯供稱張漢潮衝撲界嶺時與官兵接

仗已中鎗傷此一路係守備楊景芬帶領豫兵剿
殺但張逆得受之傷是否係中鳥鎗抑係長鎗其
用鎗傷賊者係何弁兵前摺未經詳敘姓名著卽
查明覆奏以便酌加獎賞

十五日壬寅松筠永保奏言臣松筠正從畧陽起

身欲赴漢中聞廣厚等所剿之白號賊匪從嶽
縣嘉陵江上游水淺處所躡淺過江有直奔陝

省棧道留壩鳳縣之勢竊思張漢潮賊股已東
竄商維一帶明亮緊躡追剿去此千有餘里甘
省之白號賊匪現既逼近棧道自應就近先顧
其急當卽飛札行知永保就近先爲堵禦臣永
保卽趕緊帶兵折回由褒城入棧於扼要之地
截其東竄棧道之路旋據探差回報該匪已至
離棧道七十里之兩河口探有官兵又折向南

竄經過畧陽所屬地方東可抵陝省褒城南可

竄出川省南江一帶臣永保卽就近繞至褒城

截堵臣松筠聞賊匪又復南竄因富成所帶官

兵尙未到齊卽先將已到之兵一十六百名趕

緊派赴畧陽之何家岩地方堵防甫經馳抵該

處賊匪已至望見官兵卽轉向東南茶店廟壩

一帶山徑小路奔竄直趨川省南江一路晝夜

狂奔官兵斷難繞出賊前而廣厚吉蘭泰等因
奉有

諭旨不必越境追襲並未跟蹤前來若竟無官兵躡

追該匪等必更遊奕自如

臣

松筠卽將何家岩

派撥之四川兵一千六百名就近派令原帶之
遊擊楊國林阿克東阿等帶領追躡前進並飛
行知會勒保及額勒登保等分兵追剿又行知

廣厚吉蘭泰等以白號賊匪雖已出境其藍號
之賊尙在甘省階州一帶恒瑞現在帶兵剿辦
廣厚等正可趕赴恒瑞一路顧住東北兩面協
同辦理臣松筠隨自畧陽起身前赴漢中路過
褒城與臣永保會晤籌酌張漢潮一股賊匪東
竄至河南邊界經豫省堵禦復折回西竄勢必
又至棧道而甘省階州藍號之賊甘境剿辦緊

急如向東趨奔亦與棧道相近臣永保若仍馳

赴東路則藍號賊匪一經竄至棧道又無人截

堵是北棧東西兩面均關緊要必須設法嚴防

臣松筠現已趕抵漢中臣永保將現辦一切事

宜及軍需糧餉等詳細告知松筠外卽將現帶

之兵趕赴鳳縣留壩一帶擇要截堵惟兵力稍

單臣等已札致慶成以張漢潮賊匪現旣折回

西奔若由潼關入山趕往恐落賊後莫若竟由

寶雞入棧與臣永保會合臣松筠將富成所帶

之兵就先到者陸續趕赴棧內迎交慶成帶領

無論何股賊匪竄近臣永保即可同慶成先辦

何股之賊再富成所帶鄉勇殊不安分前經勒

保奏明裁撤查該鄉勇等俱已疲乏藍縷若即

遣令各歸原處沿途必不安靜臣松筠現在將

該勇等齊集稍爲整頓接濟另行辦理奏入

上命軍機大臣傳諭松筠永保曰白號賊匪由徽縣一帶直奔陝省逼近棧道經松筠永保在褒城畧陽分路堵截賊匪卽向東南奔竄直趨川省南江實爲可惡南江從前曾被賊擾雖不比川西等處完善之區未免因賊去已久疎於防範以致此股賊匪又復乘虛竄入意存窺伺現在永保所帶兵

丁祇有一千名而松筠亦僅有一千六百名其富
成原帶鄉勇又多疲乏不諳紀律看來伊二人兵
力實單現已降旨令勒保作速酌派官兵堵禦南
江要隘此時富成原帶之兵自己陸續到齊而松
筠又將何家岩派撥之四川兵委員帶領追躡惟
當相機截擊使賊不致深入南江仍逼回陝省方
爲妥協至所奏廣厚吉滿泰因奉有諭旨不必越

境追襲並未跟蹤前來此事廣厚吉蘭泰二人並
無不是白號賊匪闖入甘境廣厚等督兵截剿已
將賊匪驅逐入陝自應陝省官兵悉力奮擊廣厚
等係守土之臣本宜以各守本境爲重非若松筠
之身任陝甘總督必須兼顧兩省者可比况甘省
階州一帶尙有藍號賊匪在彼奔竄若廣厚等遠
離該省轉難防堵或白號賊匪探知虛實又復折

回甘境該省復致無兵堵禦是以前經降旨令廣厚等不必越境遠追仍須駐劄邊界倘有折回賊匪卽可迎頭截殺前日因明亮奏調豫省帶兵之張文奇田永桐等移駐商州祇知顧陝而不知顧豫曾卽傳旨申飭今松筠等以廣厚吉蘭泰未曾跟蹤追躡爲非豈不又如明亮之欲調豫兵駐陝耶松筠等惟當就現在陝省之兵丁先行設法剿

辦不得檄令廣厚吉蘭泰出甘入陝以致顧此失
彼若陝省兵力實單卽行奏聞候旨再慶成前經
勒保札令帶兵前赴明亮一路協剿張漢潮又據
明亮奏於石泉鎮安商雒等處四面派兵堵截而
明亮則與慶成帶兵從中分擊今松筠等又欲令
慶成在棧道東西剿賊慶成以一人而數處咨調
又將何所適從朕意此時張漢潮一股最爲緊要

自應令慶成徑赴明亮一路協同擊剿速將張漢潮撲滅再行察看別股賊情擇要會剿較爲得力也

上又命軍機大臣傳諭勒保曰現據松筠等奏白號賊匪由徽縣一帶直奔陝省逼近棧道經松筠等分投堵截復向東南奔竄直趨南江現在松筠永保所帶官兵俱祇千餘難以迎擊而川省張子聰

龍紹周等七股賊匪俱經勒保酌派各將領帶兵專躡此時南江一路急須撥兵堵截著勒保於雲南廣東新到兵丁內酌量抽撥速派勇幹將弁帶領卽日前赴南江使白號賊匪不敢乘虛滋擾勒保身爲經畧於川陝等處一切剿辦事宜皆應通盤籌畫調度不得稍分畛域意存歧視况棧道疏通於川省軍營一應來往文移亦大有裨益也